



辟如日出光明無所不照菩薩入三昧者十方無所不至文殊內手從袈裟裏下探過十佛刹手指諸節其一節放千万光明出一光明端各有一蓮花蓮花上有萬菩薩坐皆如文殊其下刹有佛蓮花上菩薩者皆持釋迦文佛聲謝諸佛復持文殊聲遙為諸佛作礼如文殊手逮至賴毗羅耶佛刹刹中諸菩薩自佛言是手何等亦不見邊亦不見際賴毗羅耶佛語諸菩薩言上無數佛刹名沙訶樓陀佛字釋迦文前有坐菩薩字文殊取尊光明智慧難可當作變化如是諸菩薩自佛言今我等欲共得見釋迦文及文殊賴毗羅耶佛即放額上千億光明出照中央無數佛刹一至釋迦刹諸菩薩問佛今有是大火光烟出須臾頃便火出是火泥犁火耶佛言莫作是語是非泥犁火釋迦刹名沙訶樓陀是中火也諸菩薩問佛言是沙訶樓陀刹者何因名沙訶樓陀有是火佛語諸菩薩沙訶樓陀刹者雜惡三毒婬嫉瞋怒愚癡諸菩薩白

佛言沙訶樓陀刹中諸菩薩忍辱不瞋怒者作是為可佛語諸菩薩釋迦刹中人罵詈菩薩輕是搗捶者菩薩忍辱終不加瞋怒慈哀十方人欲令度脫皆是菩薩威神所加菩薩忍辱之恩故名沙訶樓陀諸菩薩自佛言我等聞是大歡喜得不生釋迦刹弊人之處賴毗羅耶告諸菩薩莫說是語不可沙訶樓陀刹中諸菩薩意佛言我為汝曹說東方佛字頭意刹名訶波離摩垣隨怛頭意佛刹中菩薩行六度悉具足不如沙訶樓陀刹中菩薩行六度一日一夜念十方勤苦皆使度脫何以故沙訶樓陀刹中作行勤苦譬如一佛刹壞敗時火燒其刹有人著新衣從東方來入火中從火中至西方其身出不燒是難不諸菩薩言甚難天中天佛言沙訶樓陀刹中菩薩一日一夜所行罵詈輕易之菩薩忍辱終不瞋怒譬如人行火中身不燒之難尚不及是菩薩若百倍千倍万倍億倍諸菩薩等二万人前自佛願欲上至沙訶樓陀刹供

養釋迦文佛及文殊師利菩薩等賴毗羅耶佛語諸菩薩若欲至沙訶樓陀刹者先治汝意譬如地得香花好物不喜得屎鼻涕唾膿血惡露亦不瞋佛言我何因為若曹說是語釋迦文佛刹中有菩薩先世多供養諸佛者人有急性者意善之事但口教急用今世惡故諸菩薩自佛言沙訶樓陀刹諸菩薩先世多供養諸佛求道大久何緣生沙訶樓陀弊惡人處佛告諸菩薩有二因緣今世生沙訶樓陀刹本前世與釋迦文佛俱行索佛故世世相隨復有菩薩宿命有惡不盡故生彼惡世諸菩薩自佛今是諸菩薩生沙訶樓陀刹何因緣得除宿命之惡佛言善男子善女人沙訶樓陀刹索菩薩道生貧家舍用是故除宿命惡又多病者復除宿命之惡又遭遇父母兄弟妻子病瘦死亡憂愁感傷用是故復除宿命之殃又遭逢縣官恐怖棄捐父母家室財產亡逃憂愁用是故復除宿命之殃惡若有一旦失財業窮厄用是故復除宿

放鉢經 第六張 恭字號

命之殃惡若在惡國中生本為他國所攻敗壞奔走愁憂元耶用是故復除宿命之殃惡若生弊惡人中貧賤面目醜陋形癯盲聾不屬逮人父母兄弟妻子宗親皆共憎之是人愁憂用是故復除宿命之殃惡若聞有善道歡喜欲索明師教告經道開心從受不得明師便愁憂用是故復除宿命之殃惡若復遙聞遠方有師高明智慧通達欲往從受經學身體病瘦手足拘攣不可動搖錢用乏少又無伴侶便不可行念之憂愁用是故復除宿命之殃惡若有人行求善師欲從學受經道師大明達皆知道要弟子愚癡無慧意不開解便自愁憂用是故復除宿命之殃惡若有善師欲教弟子世間之事開語經道弟子愚癡不能忍辱便棄捐師去後歸念師法戒大歡喜意悔愁憂用是故復除宿命之殃惡若有求菩薩道者卧出夢中見怨家持刀兵追逐怖恐夢中恐懼復除宿命之惡若有菩薩道家善男子善女人宿命怨惡未盡死

放鉢經 第七張 恭字號

當入涅槃中勤苦一切得善師教悔過一旦夜各三時持戒不復作惡一日一夜者頭痛身熱諸病悉除盡不復入泥犁中賴毗羅耶佛語竟文殊師利下手探鉢賴毗羅耶佛刹及中央無央數佛刹上至釋迦文佛刹皆大震動一切人皆令驚怖舍利弗起前長跪叉手白佛言何以因緣震動如是莫不驚恐者佛語舍利弗今是地震動者文殊師利探鉢是故震動舍利弗問佛言鉢在何所止佛言鉢乃在下過無數佛刹有佛字賴毗羅耶其刹名波陀沙鉢止是中舍利弗白佛言今諸菩薩阿羅漢及諸天人阿須倫鬼神龍欲見下方賴毗羅耶佛刹及中央諸佛刹欲見文殊師利變化取鉢時佛便放足下百億光明悉照十方無數諸佛刹土如是悉遍見賴毗羅耶佛刹諸菩薩見文殊師利變化取鉢時諸菩薩天人阿須倫鬼神龍皆大歡喜諸阿羅漢皆大愁毒淚出各自言菩薩尚能變化在所作為乃余何況佛威神光明難可當我等寧入涅槃中百劫後出聞

放鉢經 第八張 恭字號

菩薩法便奉行何憂不得我願賴毗羅耶佛刹中諸菩薩及中央諸佛刹土菩薩無央數皆來上至釋迦文佛所諸菩薩各自念言到釋迦文佛所供養中有菩薩散花覆一佛刹有菩薩散香有菩薩散天衣有菩薩散金銀珍寶有菩薩作音樂聲一佛刹中如是諸菩薩皆前持頭面著地為佛作礼已却坐文殊師利菩薩探鉢來出坐中諸菩薩阿羅漢諸天人阿須倫鬼神龍莫不歡喜舍利弗起前長跪叉手白佛言文殊師利有何等恩施與佛今何因緣言當念故恩佛語舍利弗乃前世無數劫時有佛字羅陀那祇有六万比丘阿羅漢七億二千万人諸菩薩中有一菩薩字恬那羅耶朝起入城分衛得滿鉢來還從街上行有一乳母抱長者子字惟摩羅波休息沙門持鉢便下乳母抱趣沙門所沙門以石蜜餅授與小兒小兒取之大美便隨沙門去乳母逐護之小兒取盡盡便還故意欲還去沙門復取餅授之兒取餅逐隨沙門出

城到佛所見佛端正身有三十二相八十種好觀之無狀見諸菩薩比丘大歡喜沙門便教小兒澡手漱口便持鉢餅與小兒令飯佛汝今得安隱後得其福小兒取授鉢餅持至佛前以手接餅著佛鉢中復過與諸菩薩比丘僧皆悉滿足食飽餅餅如故如是飯佛菩薩及比丘僧七日小兒大歡喜自說我日持一餅飯佛菩薩及比丘僧七日飯滿我必得福因是一功德得佛佛語諸菩薩阿羅漢言此是本時恩也怙那羅耶菩薩今文殊是也時小兒維摩羅波休者我身是今得佛有三十二相八十種好威神尊貴度脫十方一切衆生者皆文殊師利之恩本是我師前過去无央數諸佛皆是文殊師利弟子當來者亦是其威神恩力所到譬如世間小兒有父母文殊者佛道中父母也佛說是經時切利天上二百菩薩自念佛本文殊所教化令作功德成佛文殊何以故在佛前不成佛耶佛言文殊深入善權廣化衆生故未取道佛告

諸菩薩及比丘四衆前二百天人菩薩欲悔取二乘者見文殊變化吾應報恩今皆更發無上心修菩薩道後世皆當作佛佛說經已諸菩薩比丘僧諸天人阿須倫鬼神龍皆大歡喜起為佛作札

佛說放鉢經

佛說放鉢經

校勘記

- 一 底本，金藏廣勝寺本。
- 一 四三八頁中一行經名下，**資**、**磧**、**清**有夾註「是普超經別品殊譯」；**普**、**南**有夾註「是普超經第三品別譯」；**徑**、**清**有夾註「即普超經第三品別譯」。
- 一 四三八頁中二行譯者，**資**、**磧**作「安公云失譯」；**普**、**南**、**徑**、**清**作「安公錄失譯人名開元附西晉錄」。
- 一 四三八頁下一五行第八字「如」，**麗**作「知」。
- 一 四三九頁上五行第八字「萬」，**資**、**磧**、**普**、**南**、**徑**、**清**、**麗**無。
- 一 四三九頁上一行第一〇字「刹」，**資**、**磧**、**普**、**南**、**徑**、**清**無。
- 一 四三九頁上一二行第二字「字」，**資**、**磧**、**普**、**南**、**徑**、**清**作「號」。
- 一 四三九頁上一五行首字「文」，**麗**作「文佛」。

- 一 四三九頁上一七行第一一字「大」，  
資、磧作「火」。
- 一 四三九頁上一八行第九字「火」，  
資、磧、普、南、徑、清作「大」。
- 一 四三九頁中三行第九字「是」，資、  
磧、普、南、徑、清作「易」。
- 一 四三九頁中四行第五字「加」，資、  
磧作「知」。
- 一 四四〇頁上一八行第六字「辱」，  
資、磧、普、南、徑、清作「受」。
- 一 四四〇頁上一二行首字「出」，資、  
磧、普、南、徑、清作「坐」。
- 一 四四〇頁上一二行第八字「之」，  
資、磧、普、南、徑、清作「之殃」。
- 一 四四〇頁上末行第一〇字「怨」，  
資、磧、普、南、徑、清、麗作「殃」。
- 一 四四〇頁中二行第二字至第一四  
字，麗無。
- 一 四四〇頁中二行「時持」，資、磧作  
「持經」；普、南、徑、清作「時經」。
- 一 四四〇頁中七行「今以」，資、磧、  
普、南、徑、清無。
- 一 四四〇頁中一〇行第八字「言」，  
清作「有」。
- 一 四四〇頁下一八行第一三字「惟」，  
徑、清作「維」。
- 一 四四〇頁下一九行第四字「息」，  
資、磧、普、南、徑、清作「見」。
- 一 四四〇頁下二二行第九字「故」，  
資、磧、普、南、徑、清作「顧」。
- 一 四四〇頁下末行第一〇字「逐」，  
資、磧、普、南、徑、清作「遂」。
- 一 四四一頁上五行「取授」，資、磧、  
普、南、徑、清作「即受」。
- 一 四四一頁上一三行末字「是」，麗  
作「是也」。
- 一 四四一頁上一四行首字「今」，資、  
磧、普、南、徑、清、麗作「今我」。
- 一 四四一頁上一八行第八字「到」，  
資、磧、普、南、徑、清、麗作「致」。
- 一 四四一頁中四行第一〇字「諸」，  
徑、清作「諸大」。